


TEZAU LITURGIC
15 NOIEMBRIE

SLUJBA
SF.CUVIOS
PAISIE
VELICICOVSCHI
DE LA NEAMȚ



MOSCOVA, 2000



Служба

преп. Паисию Величковскому

(РНБ, СпбДА 279)

Сия служба составлена вскоре после преставления святого старца его учениками и последователями. Имеет историческое значение. Рукопись хранится в собрании Российской Национальной Библиотеки.

Глас 4. Подобен: Званный свыше:

На высоту добродетелей возшед, монашески подвизался еси, отче наш Паисие, учя, наказуя и вразумляя не пренебрегати богоугодного пути: сам ревнуя ревновал еси древних святых житию, образ благ всем был еси, и многия беды претерпел еси, дондеже терпением многим, подвигом же и любовью всех о нем уверил, написав нам и свидетельства от священного писания.

Глас 5.

Искусный врач был еси, зело бо легким врачеванием врачевал еси приходящия к тебе, не укоряя оных припадком болезни, но яко искусный терпением своим в сердца их чувство полагал еси не приближаться ко оному вреду:

влиавши же врачевство твое в самую глубину ран, совершенно исцелял еси, радостных же и мирных отпускал еси их, да не боязненно приходят ко врачевству твоему, отче наш Паисие.

Слава. Глас 6.

В последнее время первый от подвижник показался еси, преподобие отче наш Паисие, приимши бо кресте последовал еси Христу, и воскресил еси древнюю души доброту, еже по образу Божию и по подобию быв, и ныне радуешься со аггелы насыщаяся желаемого: темже молим тя, моли спастися душам нашим.

И ныне. Богородичен.

Богородице, ты еси лоза истинная, возрастившая нам плод живота; тебе молимся, молися Владычице со святыми апостоли помиловати души наша.

Канон преподобному старцу Паисию,
творение священномонаха имярек.

Глас 6.

Песнь 1. Ирмос.

Помощник и покровитель бысть мне во спасение, сей мой Бог и прославлю Его, Бог отца моего, и вознесу Его, славно бо прославися.

Припев. Преподобие отче наш Паисие, моли Бога о нас.

Источник сладкотекущий из уст твоих, отче наш Паисие, божественного учения текуще: да услаждает присно поминающыя его и последующыя твоему учению.

Не исходно в келлии сидя, умом же всех обходя, рассуждал еси различныя раны: много различных естеств и всем целительный и приятный пластырь прилагал еси отче.

Слава.

Начинающаго воспоминати твоя добродетели, не остави отче от словеснаго твоего стада, но оградивши своими молитвами, сохрани невредима от расхищающаго волка.

И ныне.

Молим тя, Богородице Приснодево, сохранить присно рабы твоя, ихже отходяй оставил есть твоему хранению.

Песнь 3. Ирмос.

Утверди Господи на камени заповедей твоих подвигшееся сердце мое, яко един свят еси и Господе.

Аще и болен был еси, и многия раны на теле имел еси, но множайшыя много душевныя раны

исцелил еси приходящих к тебе благим твоим обычаем и кроткими словесы, отче Паисие.

Крепко болезновал еси телом, зане исходя глагола еси: уготовляюся на смерть егда исхожду в церковь, зане не вем возвращуся ли здоров или на пути постигнете мя смерть.

Слава.

Присный есть обычай святых елико приближаться им к Богу, толико множае глаголати: еще не окончах, еще не готов есмь, дондеже всесовершенно души своя предаша в руке Божии: темже и ты, о отче, аще и совершен был еси, но всегда готовался еси, моли да спасуся твоими молитвами.

И ныне.

Святая святых, Богородице Дево, молися сыну твоему Христу Богу нашему, да подражатели бывше им наследим уготованное нам от сложения мира, славяще тя Приснодеву.

Седален. Глас 8. Поем повеленное.

Единою в лето исхождал еси из келлии твоея, отче Паисие, и обзирал еси селение учеников твоих, ездя, обзирая и назнаменуя коегождо их келлию: солнцу заходящу и со слезами молился еси, вручая их Богу и глаголя: «Господи, огради

сие малое стадо и сохрани е от волков, губящих е».

Слава и ныне. Богородичен.

Пособствуй пресвятая Владычице отцу нашему иеросхимонаху Софронию и молися присно с преставленным отцем нашим Паисием сохранить стадо твое от волков губящих е.

Песнь 4. Ирмос.

Услыша пророк пришествие твое, господи, и убояся, яко хочещи от Девы родитися и человеком явитися, и глаголаше: услышах слух твой и убояхся: слава силе Твоей Господи.

Незлобивый твой нрав и кроткое сердце, неприемлющее злобы на открывающих тебе сию, отче Паисие, но яже от нея ко оним злость забвению предавая, помощи же руку скоро подавая, восхищал еси от всевающего ю.

Смерть твоя честна, но скоро и безизвестна пришедши не зело поздно, но скоро и самовластно, восхитивше тебе, оставила нас сирых и от плача неутешных.

Слава.

Аще и зело оскорбих и огорчих твое сердце, но увидев его незлобие припадаю и молю тя: помяни и мене, идеже предстал еси пред Богом,

да не отриновен буду и тамо тебе и словеснаго твоего стада.

И ныне.

Со имевшим на тя упование пастырем нашим молися, Владычице, сыну твоему Христу Богу нашему за ны, оставшыся под твоим покровом: да сподобите ны грешныя Царствия своего.

Песнь 5. Ирмос.

От нощи утренеюща, человеколюбче, просвети, молюся, и настави и мене на повеления твоя, и научи мя, Спасе, творити волю твою.

Чада твоя убогая вси есмы оставленна на земли, отче Паисие, рыдаем с болезнию сердца: аще и вемы, яко неоскудно множае молишися о нас, но рыдаем неутешно за разлучение наше.

Скорбное время приспе, печальный час прииде, всех жалость объят, вси в сетовании есмы, никтоже хочет утешиться от нас. Аще и всего изобилии есмы, но неможем утешиться, якоже с тобою разлучившийся от тебе, отче Паисие.

Слава.

Аще бых видел час исхода твоего, о отче Паисие, омывал бых слезами нозе твои молящся:

да егда предстанешу Богу, испросиши телу моему здравия. Но и днесь добре вем, яко глас мой слышиши, и вся моя видиши, молюся ти: испроси мне полезное у Бога.

И ныне.

Ты веси, Пречистая Богородице, колико окрадаемь есмь в надежде спасения моего от нечувствия и нерадения. Молюся ти: победи амалики сия, да не окраден от них, наг предстану пред лицом сына твоего.

Песнь 6. Ирмос.

Возопих всем сердцем моим к щедрому Богу и услыша мя от ада преисподняго, изведе от тли живот мой.

Плачем и аки чадо, оставшееся матерняго сосца, вопием сетующе и рыдающе: о отче, где еси, почто не накормиши нас, чад своих, алчущи духовныя твоя пища.

Егда ли строптива чада твоя есмы, или преогорчихом благоутробие твое? Яко оставил еси нас аки матери, чадо пришедшу времени на твердейшую пищу, глаголюще: да питаемся сами поминающе благоутробие твое.

Слава.

Жизнь моя иждивается, дни моя преполовишася, надежды окрадаем есмь грехов моих ради и недоумию, како имам отвещати о делех моих. Но молю тя, о отче, помолися Богу, да возвратите ми время к покаянию.

И ныне.

Преклонен множеством грехов и слячен есмь от них, выю душевную и телесную приклоняю тебе Владыце, и молю тя, ты же мя исправи.

Кондак. Глас 4. Подобен: Явься.

Весел был еси образом и приклонял еси уши просящим у тебе помощи, и простирал еси руце на подъятие их, темже тя молим, моли спастися душам нашим.

Икос.

Кто бы неудивился, и кто бы не прославил жития твоего, подобнаго древным святым, о отче наш Паисие: не мякший бы он адаманта был, и не растворил бы воистинну онех, иже о веелзевуле бесы изгоняща нарекоша. Но мы, познавше по Бозе житие твое, прославляем Бога, укрепившаго тя, приносяще тебе таковая: радуйся древным святым ревнителю, радуйся, пастырю наш добрый, радуйся, светило пресветлое, сияющее во тме неведения, радуйся

церковное украшение, радуйся, яко подражателе был еси и самому Христу незлобием твоим, радуйся отче наш Паисие.

Песнь 7. Ирмос.

Согрешихом, беззаконновахом, неправдовахом пред тобою: ниже соблюдохом, ниже сотворихом, я коже заповедал еси нам: но не предаждь нас до конца, отцев Боже.

Воистинну удивила нас смерть твоя, о отче Паисие, не точию бо чада твоя растерзавше сердца своя, разбивахуся по земли, но и воздух чудно шумяще и акибы плачуще являясь, показуя нам сетования время.

Духовнии отцы несшии тя, о коль восхотели жаль удержати! Но кто можаше держати? Отверзше бо уста славовловити Бога, всякое слово, изшедшее из уст, влечаше с собою множество рыданий и источник слез.

Слава.

Мене, преступившаго твоя веления, мене, пренебрегавшаго святую твою волю, завистливаго и лукавейшаго паче всех человек, мене, исполняющего свою волю, пачеже диаволу, прости незлобие отче, благим и

кротким твоим обычем; и молися Богу даровати ми время к покаянию.

И ныне.

Врата Непроходимая, отверзи ми врата, молюся, покаяния истиннаго и покажи ми стезю покаяния Чистая, Всех Наставнице.

Песнь 8. Ирмос.

Егоже воинства небесная славословят и трепещут Херувими и Серафими, всяко дыхание и тварь пойте, благословите и превозносите во вся веки.

Чудную поистине и власть от Бога испросил еси при смерти твоей, о отче! Еюже всех ужасил еси: егда един мертвец в церкви лежаша, другой во гроб полагашеся, другой в келлии свершашеся: паки единого славою и здравием венчал еси, другагоже на одре болезни полагал еси, тако возносящихся смирил еси, смиренных же возвисил еси властью тебе от Бога данною.

Кто не удивится, и кто не прииде в размышление, и кого плаче необийме, и кому не водрузися во первых зрак чудный образа твоего, отче Паисие, не реку аки остен крепкий в сердце; но аки твердь крепкая на воде, еяже никтоже от сущих на ней двигнути возможе,

разве водрузивый ю. Добродетелем же кроткаго жития твоего кто не удивится!

Слава.

Аз един во свете твоём ходих и света твоего нечувствовах, аз един пищу твою сладкую ядох, и кормителя своего не познавах: аз един питье твое сладкое пих и сладкаго источника текущаго из уст твоих неощущах; аз едина овца, заблуждающая от твоего стада, пастырю добрый, неозлобися на мене, умоли Бога, даровати ми время к покаянию.

И ныне.

Волнуема мя бурею греховною, вопию ти, Владыце чистая, твоим ходатайством направи мя ко спасительному покаянию, и ко всеутишному пристанищу: яко да увижу свет спасения, омрачаемый присно леностию.

Песнь 9. Ирмос.

Безсеменнаго зачатия рождество несказанное, матери безмужныя, нетленен плод: Божие бо рождение обновляет естества. Темже ты вси роди яко Богоневестную матери православно величаем.

Не может поистине видевый житие твое замолчати добродетелей твоих! Кому бо

нежелателен был еси; кому руку помощи не подал еси, о ком не сожалел еси, чиего сердца неумякшил еси? Воистинну аще бы и адаманта твердейший кто был, и простейшаго бы художества к сочинению не имел, но виденное очесы и соделанное с ним доведет его к похвалению добродетелей твоих, отче Паисие.

Слава тебе, о пренебесный Царю, яко сподобил еси нас в таковой глубокой тме такового пресветлаго светильника видети, слава тебе, о неисчерпаемая милости бездна, яко показал еси нам такового источника, иже доволне напоил есть нас, сладкаго из уст своих текущаго пития! Напишася бо доволне и напаятися имуть не точию художнии витии, но и простии и невежды пития твоего, отче Паисие, аще точию не прохолодит кийждо нас горячести сердца своего.

Слава.

Мене же, отче, лакомага, еще с тобою суща, не доволне насытил еси сладкаго твоего пития, занеже отвергл мя еси аки матери чадом, угризающая сосца твоя. А днесь уже отнюд хладна: молю тя, согрей мя, да не лишуся и аз сладкаго твоего пития.

И ныне.

Емуже предстоят с трепетом Небеснии чины,
того родила еси чистая, соединившагося
человеком за благость, Егоже прилежно моли
ущедрити рабы твоя.

Светилен. Глас 1. Подобен: Гроб твой.

Времени бывшу лютаго гонения, и в кимвал
возгласившим яко срацыни, пред враты
монастирскими изшел еси из келлии твоея, отче
Паисие, облекшись в мантию и стал еси пред
церковию. Собравшимся к тебе и чадом твоим,
аки птенцем до кокоша своего, готов был еси
аки агнец на заколение.

Слава и ныне. Богородичен.

Матере тя Божию свемы вси Деву воистинну
и по рождестве являющуюся, любовию
прибегаючи к твоей благости: тебе бо имамы
грешнии предстательство, тебе стяжахом в
напастех спасение едину всенепорочную.

